



Istinska spoznaja dunjaluka (Medina)

Hatib: dr. Salah ibn Muhammed el-Budejr

30. džumadel-ula 1447. po Hidžri / 21. novembar 2025.

Hvala Allahu, Koji približava Sebi one koji traže Njegovu blizinu činjenjem dobrih djela, Koji obilno daruje one koji su Mu poslušni i dobri, i Koji prima pokajanje grešnika iako su pogriješili i zgriješili. Svjedočim da nema boga osim Allaha, Jedinog, Koji nema sudruga, svjedočanstvom iskrenog roba, koji to izjavljuje iskreno, istinoljubivo i s čvrstim uvjerenjem, i svjedočim da je naš vjerovjesnik i naš prvak Muhammed, sallallahu alejhi ve sellem, Njegov rob i Njegov poslanik, najplemenitijeg porijekla. Neka su Allahov blagoslov, milost i mir na njega, na njegovu porodicu i ashabe.

O muslimani, bojte se Allaha i ne budite od onih koji su nemarni i griješe, niti se ugledajte na nesretne i izgubljene. Allah kaže: "O vjernici, bojte se Allaha onako kako se treba bojati i umirite samo kao muslimani." (Ali Imran, 102)

O muslimani, vi ste u kući tuge, iskušenja i prolaznosti, u kojoj su brige teške, nesreće velike, događaji bolni, teškoće iscrpljujuće, mirni trenuci varljivi, ugovori bezvrijedni (ne poštuju se), a veze pokidane.

Kuća koja blista poput privida, prolazi poput oblaka, vara poput nestvarnog sna. Njen prolazak je neupitan, njena udobnost ne traje, njena patnja i iskušenja ne prestaju. Njen cvijet brzo uvehne, njen život nestaje. Njeni stanovnici samo su putnici koji se privremeno zaustavljaju, karavane koji se spremaju za polazak. U ovom svijetu oni su tek "mete" koje pogađaju njegove strijele, i "žrtve" koje guši svojim nesrećama. Kao da se već promijenilo njihovo stanje, i kao da su već pozvani na odlazak, njihova naselja postala su mezari, a njihova imanija nasljedstvo.

Dunjaluk je kuća čiji su užici obmana, a obećanja laž. Allah kaže: "A život na ovom svijetu samo je varljivo naslađivanje." (Ali Imran, 185)





“Život na ovome svijetu je samo igra i zabava, a onaj svijet je, zaista, bolji za one koji se Allaha boje. Zašto se ne opametite?” (El-En’am, 32)

A ovaj bezvrijedni dunjaluk nije ništa drugo do sjena koja nestaje i privid snova koji iščezava. Enes, radijallahu anhu, prenosi da je Allahov Poslanik, sallallahu alejhi ve sellem, rekao: “Allah je odredio da ništa od dunjaluka ne bude uzdignuto a da ga On ne spusti.” (Buhari)

Dunjaluk je kuća koju mijenjaju nesreće, u kojoj se smjenjuju tragedije, koju pomućuju razne nevolje i iskušenja. U njoj je smrt “izvukla” svoje sablje i “posijala” svoje zamke među ljudima. Ko ne umre sada, umrijet će kasnije. Allah kaže: “Nijedan čovjek prije tebe nije bio besmrtn; ako ti umreš, zar će oni do vijeka živjeti? Svako živo biće smrt će okusiti! Mi vas stavljamo na kušnju i u zlu i u dobru i Nama ćete se vratiti.” (El-Enbija, 34–35)

Gdje su naši prijatelji i naši bližnji? Smrt ih je odnijela, mezari ih sakrili.

O ti koji si uronio u grijeh i nedar, zar ne uzimaš pouku na mezarima svojih roditelja i predaka? Zar ne uzimaš pouku iz smrti braće i sestara? Pogledaj u kaburove, koliko je u njima umrlih! Oni su otišli, a ni ti nećeš ostati vječno. A i kako bi?

Pripremite se prije nego što smrt “napadne”, i opskrbite se prije nego što dođe kraj i prođu sve prilike. Nemojte da vas zavara prolazni dunjaluk, niti da vas zabavi i odvraća od pripremanja za vječni život. Nemojte da vas ukrasi ovog svijeta obmana, niti da vas njegove užici raspamete, niti da vas njegove smutnje zavedu, niti da vas njegovi šejtani i vika udalje s pravog puta.

O grešniče, razmisli o svom stanju i svom kraju. Sjeti se dana kada će tvoje vrijeme isteći, tijelo oslabiti, knjige djela biti otvorene, a tvoja vaga biti lahka. Šta te obmanulo, prevarilo i zavelo? Šta te ohrabrilo da budeš nepokoran svom Gospodaru? Šta je to što te ophrvalo i zavelo, pa si se postavio prema Silnom onako kako ti ne priliči, da počinješ haram i upustiš se u grijeh?

O ti koji si zaokupljen svojim strastima, uronjen u svoje užitke, koji rasipaš vrijeme koje se nikada ne vraća, ti koji se ne bojiš svoga Gospodara u osami, dokle ćeš skrivati





zlo iza zastora, i dokle ćeš se zatvarati u kuću radi činjenja grijeha? O ti koji činiš grijeh u osami, boj se Dana kada će kosa na glavama od straha pobijeljeti.

Allah se smilovao onome kome dunjaluk bude sredstvo kojim će stići do džennetskih bašča i kojim će se spasiti od Džehennema i njegovih dubina. Blago onom robu koji razmišlja o sebi, priprema se za svoj kabur, uređuje mjesto svog počinka prije nego nastupi edžel i prekine se njegovo djelo, prije nego što suze budu prolijevane, i pokajanje učinjeno, ali ne bude primljeno, prije nego što se nađe u utrobi puste, prašnjave i mračne zemlje, gdje više neće moći dodati nijedno dobro djelo niti umanjiti nijedan grijeh.

O muslimani, bojte se Allaha, budite svjesni Njegovog nadzora, pokaravajte Mu se, a nemojte biti nepokorni. Allah kaže: "O vjernici, bojte se Allaha i budite sa iskrenima." (Et-Tevba, 119)

O muslimani, požurite s povratkom i pokajanjem Allahu. Vaš Gospodar je Onaj Koji mnogo prašta i prima pokajanje. On oprašta grijeha iznova i iznova. Kad god se ponove grijesi i pokajanje, obnovi se Njegov oprost.

Allah kaže: "Allah želi da vam oprost." (En-Nisa, 27)

"Zašto se oni ne pokaju Allahu i ne zamole oprost od Njega, ta Allah prašta i samilostan je." (El-Maida, 74)

"...ali onima koji se pokaju i uzvjeruju i dobra djela čine, Allah će njihova hrđava djela u dobra promijeniti, a Allah prašta i samilostan je." (El-Furkan, 70)

"Reci: "O robovi Moji koji ste se prema sebi ogriješili, ne gubite nadu u Allahovu milost! Allah će, sigurno, sve grijeha oprostiti; On, doista, mnogo prašta i On je milostiv." (Ez-Zumer, 53)

"On prima pokajanje od robova Svojih i prašta hrđave postupke i zna šta radite." (Eš-Šura, 25)





Poslanik, sallallahu alejhi ve sellem, rekao je: "Tako mi Onoga u Čijoj je ruci moja duša, da vi ne činite grijeha, Allah bi vas zamijenio narodom koji će grijешiti, pa tražiti oprost od Njega, a On im opraštati." (Muslim)

U drugom hadisu stoji: "O sine Ademov, sve dok Mi dovu upućuješ i nadaš se Meni, opraštat ću ti i ne marim za ono što si počinio. Sine Ademov, kada bi tvoji grijesi dosegli nebeske oblake, a ti zatražio oprost od Mene, ja bih ti oprostio i za to ne bih mario. Sine Ademov, kada bi Mi stigao s grijesima koji su ispunili Zemlju, ali nisi Meni ništa ravnim smatrao, ja bih ti dao cijelu Zemlju oprosta!" (Tirmizi)

Ovo je Allahova plemenitost, dobrota, blagost i milost koje ukazuje Svojim robovima iako oni griješe i pretjeruju u grijеšenju. On ih poziva na pokajanje i oprost, i prelazi preko njihovih prijestupa. Svako ko se Njemu pokaje, Allah će mu pokajanje primiti. Zato obrišite svoje prijašnje grijeha dobrim djelima poslije njih, i požurite s pokajanjem prije nego što bude kasno. Ne odgađajte pokajanje, jer onaj ko ga odgodi do trenutka kada ugleda Meleka smrti, i kada duša "zapne" u grlu, i kada mu se prsa stegnu, i kada dođe do grkljana i kada počne izlaziti iz tijela, tada pokajanje neće biti primljeno, niti će biti izlaza. Neka nas Allah učini od onih koji se kaju i vraćaju Njemu.

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

